

BEEBREO

É kálara Beebreo

Nzamá a kóbo yaá ébe nzenn ye é Mwán weñ

1 ¹Nzamá aá kóbo ya betará ókuá abwiññ biyɔŋ, ya abwiññ memvála ébe bekúlu medzó, ²mélú má súgan má, a kóbo yaá ya bía ébe é Mwán weñ, éñe a ngá téle ñɔŋ tsígá ye byém bise, ébe éñe fe a ngá vele ya ñí dzóp ya eniŋ ngúrá.

³Éñe a ne mikwikwiñ míye é dúmá deñ, nswánn ye é ñúu deñ émyen ná tsás. Éñe fe aa baale byém bise ya efíá ye é nguu deñ. Niané a ngá mana tun misémm, éde a ngá tɔbo ósí á yóp été á mfá meyóm étɔ́ édzwée Nzamá;

⁴Éñe a súgan yaá daŋ ábo nnén álot baáŋgel, dá é tɔ́ ná éñe a ñɔŋ yaá tsígá éyola dá daŋ ya ngaŋŋ álot ébó.

Mwán aa lot baáŋgel

⁵Amú ná, á áŋgel mbé ye baáŋgel Nzamá a ngá dzó eyɔŋ enziŋ ná:

“Wa o ne é Mwán wɔm,
me byéñ yaá wa émuú;”

Aa bera dzó ná:

“Ma ye bo Éséá á mfá weñ,
Ñí aa ye fe bo Mwán á mfá wɔm?”

⁶Éde aa bera fe kóbo, éyɔŋ aa nzu ya ntóo mwán weñ éniŋ dzi ná:

“É baáŋgel bése Nzamá bé kaŋŋe ñí.”

⁷Éde, á mfá baáŋgel aa dzó ná:

“Éñe aa bo é baáŋgel beñ bivúŋ,
bébo biséññ béñ bá míkaba mí ndúán.”

⁸Ve á mfá Mwán aa dzó ná:

“Á Nzamá, étɔ́ édzwée dwe é ne akekwiñ mbéámbéá;
ntúmm édzwée ye á nzósoó éwɔ wá ó ne ntúmm ye édzwée ngómán
dwe.

⁹ O dziŋ yaá nzósoó, o víni yaá fe ntsamann metsiŋ;
 ya dзам te édo, Nzamá,
 é Nzamá we, ya mbwánn mészán
 a tóp yaá wa ádaŋ ébá béye nsámá we.”

¹⁰ Ya fe ná:

“Á Ntí, atéé ye átáraga, wa o ngá téle míbókga míye é sí ní.
 Dzóp dá e ne mbɔann ye é mó mwe;

¹¹ byá ye fe dzáŋ, ve wa wa lígi;
 byém bíse byá ye bɔ miyomm ané etóp,

¹² éde amvála ané ekót bá ye vígile,
 ya ané etóp byá ye tɔbɔ ntsénán;
 ve wa, o ne kaa átsén,
 míbú mywe myá myáá mana ki.”

¹³ Ve, á ángel mbé ye baáŋgel a dzó yaá eyɔŋ enziŋ ná:

“Tɔbɔgé ósí á mfá meyóm wɔm akekwiń ané
 ma bɔ mínzínzínŋ mywe étéle mebɔ dwe?”

¹⁴ Nde se ná ébɔ bésesé bé ne mísísim myá bɔ biséńń, milómán á mfá
 ávwála ébá bé nkún ñɔŋ akoroga tsígá?

Nkatann fwéń ye éban ákoroga é ne ya wó

2 ¹ Akála te édo dá yian ná bí bíra túga dzálá é mam bí wók yaá, a nza
 bɔ ná bí lés nzenn.

² Amú ná, ngé éfíá baáŋgel bé ngá kɔbɔ é ngá tɔbɔ kaa áfógan, ané
 ntsamann metsiŋ ya mbɔann meló óse wá ó ngá ñɔŋ fe nzósoó akira, ³ nzá
 ámvála bía bía ye sáale, ngé bía bɔ kaa ábís ábímm mora akoroga dí, édí
 Ntí a ngá tára bía kat fwéń? Bía bí yém yaá fe nguu amú ébá bé ngá ñɔŋ wó;

⁴ Nzamá ní eé vé fe ngańiá etéńń evóó, átára méndem, ya biyágán bí
 mam, ya méndzaŋ mé mam má lére nguu, ya fe medás méye á Mfúfúp
 Nsísim, ámvála nkómánn weń ó ne.

Yesus éńe aa koro bía

⁵ Amú ná, se baáŋgel ébɔ Nzamá a ngá téle éniŋ é nkún bía nzu,
 édzwée deba ásí, édí bía kɔbɔ ya dɔ.

⁶ Ve, vóm enziŋ mot enziŋ a ngá vé ngańiá eé dzó ná:

“Mot a ne dzé ná o síman ní,
 ngé ná, é mwán mot ki, ná o fép ní?

⁷ O bɔ yaá ní ná á tɔbɔ nsilann ósí avítsaŋ álot baáŋgel,
 o bwára yaá ní korona ye dúmá ya ngaŋŋ,
 míbɔann mí mam míye é mó mwe, myá o vé yaá fe ní edzwée.

⁸ Waá tɔɔ mam mése édzwée deń ásí.”

Amú ná niané a ngá tɔɔ mam mése édzwée deń ásí, eé ndzí lík dzóm enziŋ
 ná dé sés édzwée deń ásí. Ve ye anzukwiń éndagá, bía bíí téa ná byém bíse

bí ntɔ́w édzwée deñ así. ⁹Ve bía bía yén éñí a ngá tɔ́bɔ nsilann ósɪ oyomm avítsaŋ álot baáŋgel, é Yesus a ntɔ́w ya korona ye á dúmá ya ngaŋŋ ébe mɪdzúúk mɪye awú, amú é mvɔmm Nzamá, a kyak yaá awú ákála bot bése.

¹⁰Amú é ngá yian ná, ébe éñí byém bise bí ngá veleban ákála deñ, ákála deñ fe byém bise bí ne, a ke yaá ya abwiññ bwán á dúmá, éñe a mana bó tɔ́w nkomann amú éndáglé éñí a ngá teñ ákoroga deba.

¹¹Amú ná ané éñí aa téle eki, ané ébá bé ntɔ́w ntélán eki, bésesé bá sɔ́ ébe mbɔ́w, ákála te édo áá wú osoán ye á lwée bó ná bɔ́bédzan,

¹²eé dzó ná:

“Ma ye kat bɔ́bédzan fwéñ éyola dwe énzénzan ékóánn bot été, ma ye wa yee byeá bíye á nkaŋaŋ.”

¹³Aa bera dzó ná,

“Ma ye tɔ́bɔ ya ñí mebúnn.”

Aa bera dzó ná:

“Dággán, ma ñí bíabe é bwán Nzamá a vé yaá ma.”

¹⁴Dá é tɔ́w ná, bwán bé ñɔŋ yaá fufúlu ñúu ya mekií, Yesus ñí aa ñɔŋ fe byɔ fufúlu ntéññ mbɔ́w, á mfá ye ná, ébe áwú deñ, á tsam é nguu édzwée éñí a ngá dzwée ya awú, dá yíli ná, débale;

¹⁵a tɔ́w fe filí ébá bésesé, bé mbé bé tɔ́w áloá wɔŋŋ ye áwú tán ntéññ eniŋ ngúrá.

¹⁶Amú ná bébélá, se baáŋgel ébɔ́ aá nzu vwála, fáve ná aá vwála é mvɔŋ Abraam.

¹⁷Ákála te édo, ñí a ngá yian bɔ́ ntéññ mbɔ́w ya bɔ́béñaŋ ébe mam mése, á mfá ye ná á bɔ́ ntébosú befára bá tɔ́bɔ ya ñí mebúnn, a ne fe ya nlém engóngɔ́w á mfá ye ébe é mam Nzamá, ná ávea mísémm bot.

¹⁸Éde, dá é tɔ́w ná émyen ñí aá dzuk ya nyénánn mebóblé, a belé nguu á mfá ye á vwála ébá bá yén mebóblé.

Yesus aa yian ya ngaŋŋ álot Moisés

3 ¹Á mítɔ́pbán mí bɔ́bédzan, amú dzam te, mína é bot míní ñɔŋ yaá fufúlu ekígá ye á dzóp nsámá mbɔ́w, túgán dága Yesus, ápostol ya ntébosú befára ye á mbwínánn wea bía mem.

²Éñí a ngá téle ñí, á mbé a tɔ́w ya ñí mebúnn ntéññ mbɔ́w fe ané Moisés ébe é ndá bot áse Nzamá.

³Amú ná é lánban yaá ná aa yian ya dúmá ádaŋ Moisés; ntéññ mbɔ́w fe ané nlóŋndá a belé ngaŋŋ ádaŋ ndá ébyen.

⁴Ákála ná ndá ése e ne nlóŋán ya mot enziŋ, ve éñí aa bɔ́ mam mése éñe a ne Nzamá.

⁵Éde Moisés a mbé éñí bá tɔ́bɔ ya ñí mebúnn ébe é ndá bot áse ané mbo biséññ ébe é ngañiá ye é mam bá ye súgan kɔ́bɔ.

⁶Ve Kristo ñí a tɔ́w ané Mwán ébe é ndá dzeñ; é ndá dzeñ te édo e ne bía, ngé bía túga biñ kaa ádzɔɔ, mebúnn ya mevágá méye oyan.

Áwaabé é bot Nzamá

7Dzam te édo, ámvála Mfúfúp Nsísim aa dzó ná:

“Ngé mína wók é kíŋ deñ émuú,

8 kaa áboan mílém myenan aleét;
amvála ané é tám nsɔŋán méyéá,
é tám mebóblé éyáŋŋ été;

9 é vóm beésúa bé ngá bóble ma,
baá kyak ma, afáŋbo ná bé ngá yén míbɔann myám
táŋ mibú mewóm mé nii.

10 Amú dzam te édo me ngá yéá ya myee bot te,
éde me ngá dzó ná, ‘bá vus nzenn mílém myeba été eyɔŋ ése,
béé ndzí ki yem míkómánn myam.’

11 ané me ngá kan sɔŋ ébe méyéá mam ná:
‘Báá ye ñíi áwaabé dam été amvála enziŋ.’ ”

12 Á bóbédzaŋ, dággán ná mot enziŋ ye ébe mína a nza tɔbo ya ekúkwát
nlém ye kaa ábwíni, á mfá ákánan ya é Nzamá a ne ntétéá. 13 Ve ná,
kada mos, mína bébyen lépgánán bevós ébe ébá bevós, éyɔŋ bé ngén bá
dzó ná, “Émuú”, a nza bo ná mot enziŋ ye ébe mína a ntós ya nlém aleét
akála meduk mé nsémm. 14 Amú ná ébe Kristo bí sɔ yaá bo beɔŋ ngap
fufúlu, ngé e ne ná bía biñ nguu mébúnn mea bí ngá tára ya mo kaa
áfógan akekwiñ asúgánn, 15 éyɔŋ bé ngén bá dzó ná:

“Ngé mína wók é kíŋ deñ émuú,

kaa áboan mílém myenan aleét amvála ané é tám nsɔŋán méyéá.”

16 Akála ná, benzá bé ngá wók ñí, ná baá sɔŋ fe ñí ya meyéá? Nde se
ébá bésesé bé ngá kólo Égipto ya Moisés? 17 Benzá ki Nzamá a ngá yéá
ya bó ébe mibú mewóm mé nii? Nde se ya ébá bé ngá bo nsémm, míbim
myeba myá mí ngá lígi fe mí bóo éyáŋŋ été? 18 Benzá ki a ngá kan ya bó
sɔŋ ná báá ye ñíi áwaabé deñ? Nde se fáve ébá bé ngá bo meló? 19 Éde, bí
téa ná béé mbé ñíi été akála é kaa mbwínánn weba.

4 1 É tám ngaá ye áñíi áwaabé deñ é ngén dá laŋan, bí tɔbɔgán ya
nkée ná mot enziŋ ye á nsámá wenan a nza súp. 2 Amú ná bía bé
kat yaá fe mbamba fwéñ ntéññ mbós ané ébó; ve éfíá bé ngá kat bó, deé
ndzí bo ya bó abúánn, akála ná ébá bé ngá wók do, béé ndzí do fulan ya
mbwínánn. 3 Éde bía é bot bí bwíni yaá, bí ñíi yaá fe áwaabé te, ámvála a
dzó yaá ná:

“Ané me ngá kan sɔŋ ébe méyéá mam ná:

‘Báá ye ñíi áwaabé dam été.’ ” Afáŋbo ná míbɔann myeñ myá bem
mana atée ye á mvelann éniŋ ngúra.

4 Amú ná vóm enziŋ a kóbo yaá aaná, ébe álú zangbéá:

“Nzamá a ngá waabe álú zangbéá ébe bíséññ byeñ bise.’

5 Ya fe ná:

“Bǎá ye ñíi áwaabé dam été.”

⁶Dá é tǒǒ ná, é ngén dá dzéŋ ná bot benziŋ bé ñíi été, ébá bé ngá tára wók mbamba fwéñ béé ndzí ñíi ákála meló. ⁷Éde Nzamá a bera yaá téle mos ofé: “Émuú”, eé kóbo ébe David, niané abwiññ tám é lot yaá, ámvála bé tára yaá dzó ná:

“Ngé mína wók é kíŋŋ deñ émuú,
míní táa bo mílém myenan aleét.”

⁸Akála ná, ngé Josue á vé bó áwaabé, ngé bǎá bera kóbo ya mos mfé ébe melú méye ósú. ⁹Édo é ne ná, Sátará enziŋ ye áwaabé a ngén á mfá áyɔŋ Nzamá. ¹⁰Amú ná é mot a ñíi yaá áwaabé deñ été, émyen ñí a waabe yaá ébe bíséññ byeñ, ntéññ mbóǒ fe ané Nzamá ñí a ngá waabe ébe áabyeñ. ¹¹Édo ná bí bíragán ádzéŋ ná bí ñíi ébe áwaabé te, a nza bo ná mot enziŋ eé vú efonann meló te aa kpéñ.

¹²Amú ná éfiá Nzamá é ne ntétéá, dá dzéa fe eséññ mvéáñ, é ne fe akáp ádaŋ é nzwaokenŋ ése é ne ya nzep é beañ; dá túgan akekwiñ dá kána nlém ya nsísim, moŋ mé ñúu ya nsómsómŋá, á mfá ábíli asímánn ya mikómánn míye á nlém été. ¹³Éde dzam enziŋ ye é ne mvelann dáá sɔbo ébe ású deñ, ve mam mése mé ne éndendaŋ ya swésweññ ébe ású é mís éñí bía yian ke ávé tán.

Yesus, mora ntébosú befára

¹⁴Dá é tǒǒ ná bía bí belé é mora ntébosú befára a ngá ñíi á dzóp été, Yesus, é Mwán Nzamá, éde bí biñŋán nguu mbwínánn wea bía mem. ¹⁵Amú ná bíí belé ntébosú befára a ne bo kaa áwóráñ áteák dea, fáve éñí a yén yaá mebóblé memvála mése ané bía, ve ñí kaa nsémm. ¹⁶Édo ná, ya mebúnn bí keŋán étǒǒ édzwée ye abwará bebeñ, á mfá ye ná bí ñɔŋ nyénánn engóngóǒ, bí koan fe ya ábwará dá vwála bía, é tám bí ŋga yi yaá do.

5 ¹Amú ná ntébosú befára áse bá tǒp, aa só bot été, ná a bo ntébe nzaŋŋ amú bot, á mfá ye ná ébe é mam Nzamá, aa ye vé bivévé ya metúnŋa ákála misémm. ²Éde ñí a ne fe do bo ya añep á mfá ébá bé ne midzímán ya ébá bá vus nzenn, é tǒǒ ná émyen ateák dá dá dzwée fe ñí; ³ya dzam te édo aa yian vé ya do metúnŋa ákála misémm, ané émyeñ émyen ané émí bot. ⁴Éde mot enziŋ ñí áá ñɔŋ ki ngaŋŋ te ébe émyen, fáve niané Nzamá a lwée yaá ñí ámvála é ngá bo fe ébe Aarón.

⁵Néa fe Kristo eé ndzí vé émyen dúmá ná átɔbo ntébosú befára, fáve éñí a ngá dzó ya ñí ná:

“O ne é Mwán wɔm,
mé byéñ wa émuú.”

⁶Ámvála aa dzó fe vóm mfé ná:

“O ne fára mbéámbéa
ámvála nsámá Melkisedek.”

⁷Éde mǎlú Kristo á mbé émo éniŋ dzí, a ngá dzaa ya meyaŋlǎn ya míge ya mora dú ébe éñí á mbé ñí koro áwú. Ané Nzamá a ngá wók ñí ákála ná a mbé belé ya ñí wǎŋŋ ye éki. ⁸Éde afáŋbɔ ná a mbé Mwán, ébe mǐdzúuk aa yén, a ngá yága mbɔann mewók; ⁹éyɔŋ a ngá mana dzálá édí a ngá yian bɔ, ané a ngá nzu bɔ nzenn ye ákoroga é ne mbéámbéá ébe ébá bésésé bá bɔ ñí mewók, ¹⁰Ñí a tɔɔ ntélán Nzamá ané ntébosú befára, amvála ané nsámá Melkisedek ó ne.

Ábɔ meló a ne áŋgónó dzam

¹¹Ébe édí te, bí belé abwiññ mam ye ádzó, ve ayéñ ye ákelan, dá é tɔɔ ná mína míní nzu yaá bɔ miló aleét á mfá áwók. ¹²Amú ná ábímm tám é lot yaá dí, dá é tɔɔ ná mína míní ŋga yian yaá bɔ beyágale, ve dá dá yian ná mot enziŋ a bera mína yágale metáraga mé mam méye bífiá Nzamá, ya fe ná míní nzu yaá bɔ ébá bá yian ya meñáŋ, se beñá bidzí. ¹³Ákála ná éñí áse a ngén aa ñú meñáŋ, áá vébán ya nzósoó éfiá, amú ná a ne nkéŋá mwán. ¹⁴Ve beñá bidzí bí ne á mfá beñá bot, ébá bête bé mana yaá yem ákála evébánn, bé ntɔɔ fe nkɔkgán á mfá ábíli abé ya mvéáñ.

6 ¹Dá é tɔɔ ná, bí lík yaá ómvús meyágalé méye ósúá ébe Kristo, bí keŋán ósú á mfá beñá bot, se ábera ábwí mbókga ye édzoban biwúwúa mǐbɔann, ya édí ye á mbwínánn ébe Nzamá, ²ya édí ye áyágalé á mfá meduubán, ya édí ye ábere bot mó, ya édí ye á nwómán miwúán, ya édí nkíkŋán misaŋ ó ne mbéámbéá. ³Éde bía ye bɔ dzam te, ngé Nzamá aa yébe dɔ. ⁴Amú ná, ébá bé tara yaá tɔbɔ éyéá été, bé kyak dás ye á dzóp, fufúlu bé ñɔŋ Mfúfúp Nsísim, ⁵bé kyak fe é mbamba éfiá Nzamá ya menguu méye mbéámbéá éniŋ á nkún nzu; ⁶véa, bé búlán ómvús, bot bête bé sés bera búlán á mfá édzoban; ákála ná bébyen bá bera kele é Mwán Nzamá á krús á mfá weba bébyen, béé lére ñí osoán éndendaŋ. ⁷Amú ná, é sí é ñú yaá é mveŋ da bɔ deé ku été, niané da féá fe bilwá bí ne ya abúánn á mfá ébá bá beñ dɔ, da ñɔŋ fe ábwará Nzamá. ⁸Ve ngé dá féá miséé ya biyɔɔ, dé sés fe ya abúánn eé ntɔɔ ná dá ñɔŋ bibɔŋ, ané bá súgan dɔ dzígi.

⁹Á mindzindziŋŋ atwaa bía kɔbɔ néa, bía bía yem bébélá é mam má daŋ ya mvéáñ, mé tɔɔ fe éma méye ákoroga á mfá wenan. ¹⁰Amú ná Nzamá a sés ekúkwát ye a ne vwían éséññ denan, ya édziŋŋ míní lére yaá ébe éyola deñ, é tám mína bɔ míní séan, míní ngén fe mína séan ya mǐtɔpbán mí bot. ¹¹Ve bía kómo ná kada mot ye ébe mína, á léregé amvála nkómánn te, ná á bwíni, á tɔbɔ fe ya oyan óse, akekwiñ asúgánn, ¹²á mfá ye ná míní nza bɔ mindéndeát, ve fáve é bot bá vú ébá ya mbwínánn ya fe edzíp bá ñɔŋ mengaá tsígá.

¹³Amú ná éyɔŋ Nzamá a ngá kyaa Abraam ngaá, a ngá kan sɔŋ ébe émyen, ákoan ná ñí éé mbé kan sɔŋ ébe é mot mfé aa daŋ ñí, ¹⁴eé dzó ná: “Bébélá, ma ye wa bíra vé abwará, ma ye fe wa bíra bɔ ná ó fwiñ.” ¹⁵Éde,

néa éñe Abraam a ngá yana ya edzíp, ané a ngá ñoŋ ngaá te. ¹⁶Amú ná, niané bot bá kan soŋ bé túp éñí aa daŋ bó, éde á mfá weba, néa éñe nkanann soŋ ó ne ya ayílíga, ó mana fe bisó bíse. ¹⁷Ya dzam te fe, Nzamá ñí eé túga fe kómo lére beñoŋ ngaá tsígá ná, é mam aa kyaa bé sés mo tsén, éde a ngá vé nkanann soŋ amvála ané ebánn; ¹⁸á mfá ye ná, ébe míboann mí beañ mí ne kaa átsén, ya ébe émyo Nzamá a sés bo mineá amvála enziŋ, éde ya mam méte bía bí ne tobo ya mo ya abwiññ mfoŋann mílém, bía é bot bí ke ya mbíí ná bía biñ óyan ó ntéle bía ósú. ¹⁹Éde émo fe bí mbelé ané akon ye á nlém, edí é ne kaa áfógan é yém fe, dá ñíí fe akekwiñ étóp áyát, ²⁰é vóm Yesus a ngá ñíí ákála dea ané é mot ósúa, a tobo ntébosú befára mbéámbéa amvála ané nsámá Melkisedek.

Melkisedek a mbé é fára Nzamá

7 ¹Amú ná Melkisedek te, kéza ye á Salem, é fára é Nzamá a ne Oyaáp Óyóp, éñe a ngá ke toban ya Abraam, ané a ngá vé ñí abwará éyoŋ Abraam a ngá búlán ná aa só áywiñ bekéza. ²Éde fe Abraam ñí a ngá kee ñí ngap awóm ye byém bíse. Éyola deñ, dá tára yíli ósúa ná, kéza ye á nzósoó; véa, kéza ye á Salem, é ne ná, kéza ye á mvwaá; ³kaa éséá, kaa ñíá, kaa mebárán; mélú meñ mé sés ya atáraga, éniŋ dzeñ dá kaa ki ya asúgánn, ve ñí a toó ané é Mwán Nzamá, aa laŋan fára mbéámbéa.

⁴Dággán, nzá amvála nnén mot te á mbé, éñí emvámvamm Abraam a ngá vé ngap awóm é byém a ngá dut. ⁵Éde e ne ná, é bwán Leví bá ñoŋ asúk éséññ fára, ébó bé belé mvéná ná bé ñoŋ méyoŋ meba été ngap awóm amvála nkoó métsiŋŋ wá lére; dá yíli ná, ébe bobéñan; afáŋbo ná ébá béte bá só mékií Abraam. ⁶Ve éñí mebárán meñ mää só ébe bó, a ngá ñoŋ ngap awóm ébe Abraam, ané a ngá vé fe éñí á mbé a belé mengaá abwará. ⁷Éde kaa bisó binziŋ, é mot a ne omomot aa ñoŋ ábwará ébe éñí aa daŋ ya nnén. ⁸Édo ná ó vá, é bot bá wú bá ñoŋ ngap awóm; ve ó wéñ éñí ñí bá vé ngañiá ná a ne ntétéá. ⁹Bá dzó fe do néa, ná ébe Abraam, Leví éñí aa ñoŋ ngap awóm, ñí aa yáán fe do. ¹⁰Amú ná ákoan a ngén á mékií éséá été éyoŋ Melkisedek a ngá ke toban ya ñí.

¹¹Amú ná ngé á bo ná edí te é mbé dzálá edí bá soŋ ya do ébe ásúk éséññ bwann Belevita, (akála ná ébe mbókga te éwo ayoyŋ dá ñoŋ nkoó métsiŋŋ). É ngá ye bera ábo ya asweññ á yá ná, fára mfé á tébe ané Melkisedek, bá kaa ki ñí ánóman amvála Aarón? ¹²Amú ná éyoŋ bá tsén ásúk éséññ befára, dá yian fe ná tsén nkoó métsiŋŋ da eé bo fe. ¹³Akála ná ébe éñí bá kóbo ya ñí é mam má a ne éñí ye áyoŋ afé, edí ye mbóó enziŋ áá bé bo éséññ áltar. ¹⁴Amú é ne éndendaŋ ná Ntí wea a váma yaá ébe Judá, ébe áyoŋ Moisés eé ndzí kóbo dzam enziŋ á mfá edí dá nama befára.

¹⁵Éde edí dá dá daŋ fe bera tobo éndendaŋ ná, ngé fára mfé aa sian ébe éfonann Melkisedek; ¹⁶éñí a veŋan yaá ñí se ébe ákála nkoó metsiŋŋ

éwí mot binam, fáve ébe ákála é nguú ye éniŋ é sés mana amvála enziŋ.

¹⁷Amú bá vé ngañiá ná:

“O ne fára mbéámbéa

amvála ané nsámá Melkisedek.”

¹⁸Akála ná, véa é mvená ósúa eé kígí yaá, dá é tɔ́ɔ ná e ne ateák ya fe kaa eban. ¹⁹Akála ná nkɔ́ɔ métsiŋŋ weé ndzí dzálá édí bá sɔ́ŋ, éde véa bá lére óyan wá daŋ ya mvéáñ, ébe éwɔ́ bía yit ya wɔ́ Nzamá beben.

²⁰Éde, dá é tɔ́ɔ ná dá deé ndzí ki bɔ́ kaa nkanann sɔ́ŋ, ²¹[ve ébá bevɔ́ɔ bé ngá tébe befára kaa nkanann sɔ́ŋ], ve éñe, ya nkanann sɔ́ŋ éñí a ngá dzó ná:

“Ntí Nzamá a kan yaá sɔ́ŋ, áá ye ki tsén kíŋŋ,

‘wa o ne fára mbéámbéa.’ ”

²²Ya dzam te édó Yesus a sɔ́ yaá vejan ebánn ye élat dá daŋ ya mvéáñ.

²³Ya fe ná, befára béte bé ngá bɔ́ abwiññ akála ná awú é ngá dzip bɔ́ ná bé tsíni ya asúk éséññ. ²⁴Ve ñí aa tsíni mbéámbéa a belé ásúk éséññ fára e ne kaa átsén. ²⁵Ya dzam te édó a ne koro ébá bá ke ébe Nzamá amú éñe, eyɔ́ŋ evɔ́ɔ akekwiñ mbéámbéa, dá é tɔ́ɔ ná aa niŋ mbéámbéa á mfá áyaglan ákála deba.

²⁶Amú é ngá yian ná bí belé amvála ntébosú befára te: é mot a ne eki, kaa bidzo, kaa mvin, nkánán ya bebo misémm, a tɔ́ɔ fe ededea mbélánn á dzóp été; ²⁷Ñí áá yi ná á vé metúnŋa melú mése ané betébosú befára bevɔ́ɔ; ósúa ákála mísémm myeba bébyen, é belan véa ya ákála émi bot; amú ná éñí te, ñí áá bɔ́ édí te eyɔ́ŋ evɔ́ɔ, é tám a ngá vé é ñúu deñ émyen metúnŋa. ²⁸Akála ná nkɔ́ɔ métsiŋŋ wá téle mitéteák mí bot ané betébosú befára, ve nkanann sɔ́ŋ, éwí ó ngá sɔ́ nkɔ́ɔ metsiŋŋ ómvúmúva wá wá téle Mwán, éñí aa dzálá édí bá téle ñí ya dɔ́, mbéámbéa.

Mvaŋ ye á mfefēñ élat

8 ¹Éde nsámá medzó bía kɔ́bɔ́, édí dá daŋ é ne ná, bí belé ámvála ntébosú befára é ngá ke tɔ́bɔ́ ósí á mfá meyóm étɔ́ɔ édzwée Nzamá á dzóp été; ²ané mbɔ́ biséññ ye é byém bí ne eki ya bebélá etɔ́bɔ́ga, éñí Ntí émyen a ngá téle, se mot binam. ³Amú ná ntébosú befára áse, a ne ntélán á mfá ávé Nzamá bivévé ya metúnŋa, édó fe dá dá yian ná émyen ñí á belé dzóm ye ávé. ⁴Édó é ne ná ngé á tɔ́bɔ́ é sí ñí, ngé a sésés ki fára, akála ná ébá bé ne ntélán ya metsiŋŋ ná bá vé bivévé, ⁵ébá béte bé ne bekaŋ béye ovakga ya efonann ye mam méye á dzóp été, amvála ané bé ngá vé Moisés mbámm eyɔ́ŋ a ngá bɔ́ ná a nkún téle etɔ́bɔ́ga, amú baá dzó ñí ná: “Túga bɔ́ byém bíse amvála évagle bé ngá lére wa á nkoó ó yóp.” ⁶Ve éndagá, éñe á mbelé ásúk éséññ fára dá daŋ ya mvéáñ, amú dá é ntɔ́ɔ ná éñe fe a ne mvaŋ ye élat dá daŋ ya mvéáñ, édí é ntɔ́ɔ ntélán amú mengaá má daŋ ya mvéáñ. ⁷Amú ná ngé élat ósúa é mbé dzálá édí bé ngá sɔ́ŋ, ngé édí beañ deé ndzí biñ afóo.

- ⁸ Amú ná eé koan ná deé ndzí dzálá, aa dzó bó ná,
 “Ntí aa kóbo ná,
 dággán, melú má nzu
 émá ma ye téle mfefeñ elat bíabe é ndá bot Israel
 ya fe é ndá bot Judá.
- ⁹ Se ámvála elat me ngá bo bíabe beésúa
 é mos me ngá biñ bó ó mó,
 ná ma vea bó á sí ye Égipto;
 akála ná béé ndzí tsíni ya élat dam,
 ané ma me ngá lama fe bó, néa éñe Ntí aa kóbo.”
- ¹⁰ Ya dzam te, éde Ntí aa dzó ná:
 “Niané melú méte má ye lot,
 élat dí édo ma ye bo bíabe é ndá bot Israel;
 ma ye tɔɔ métsiŋ mam mėsímánn meba été,
 ma ye fe bó mo tsili mílém myeba été.
 Ma ye bo é Nzamá weba,
 bá bá ye fe bo áyɔŋ dam.
- ¹¹ Éde kada mot ye ébe bó áá ye fe vé mɔŋjanam weñ ayágalé, ngé ki
 kada mot ébe mwanñan, eé dzó ná:
 ‘Dzénge ná o yem Ntí’, akála ná bėsesé bá ye Ma yem,
 atée ye á mɔŋŋ akekwiñ é ñá mot ye énzénzan deba.
- ¹² Amú ná ma ye yén bíkúkwát byeba engóngóó,
 ma kaa ki ábera belé amvála enziŋ mısémm myeba ósımánn.”
- ¹³ Éde éyɔŋ aa dzó ná “mfefeñ elat”, aa lére ná edí ósúa é ntɔɔ nnomm,
 é dzóm dá é ntɔɔ nnomm, deé ke fe dá bo ya ábo nnomm, é ntɔɔ bebeñ ye
 ádzán.
- 9** ¹ Ve ngúrá mfá, élat ósúa é mbé é belé edí atsiŋŋ dá manan á mfá
 nkaŋann, ya fe é templo e ne eki á sí ó vá. ² Amú ná etɔɔbɔga é mbé
 nkemann aaná, mfá ósúa éwɔ bé ngá lwée ná é Vóm ó ne Mfúfúp; été éñe
 ebele nduná, téble, ya mífémm mí ne ya ntélán mam áyát. ³ Éde etɔɔbɔga,
 á mfá beañ étóp áyát, éwɔ wá bé ngá lwée ná é Vóm wá dan ya Mfúfúp;
⁴ été éñe á mbé ya áltar koŋ bá dzígi mbwánn enum, ya árka ye élat é
 tɔɔ mbomann ya koŋ ásesé, árka été éñe á mbé ya é kóp koŋ e mbé e
 belé manná ya ntúmm Aarón ó ngá féá, ya fe bifas mekwá, ébí bíye élat;
⁵ árka áyóp ñí ya Kerobín béye á dúmá bé búru áyóp ya ávwéñ deba, é
 vóm ndzámann misémm wá dzálában; ébe mam méte bé sés mo tájele ya
 nkóbo éndagá.
- ⁶ Ve mam méte mé mbé nkemann aaná; tám ése befára bá ñíi etɔɔbɔga
 á mfá ósúa ná bá dzálá nkaŋann weba. ⁷ Ve mfá beañ, ntėbosú befára
 etámm éñe aa ñíi été eyɔŋ evóó á mbú, kaa ki áñíi kaa ná a belé mékií á
 mfá ávé metúnŋa ákála deñ émyen, ya fe ébe mısémm míye á ndzímán
 ayɔŋ. ⁸ Mfúfúp Nsísim aa lére ya dzam te ná, nzenn ye é Vóm wá dan

Mfúfúp dǎá bé yǒŋbe, ébe é tám ásesé étɔɔga ósúa é ngén é télé. ⁹Édí te dá e ne ndem ye é tám ñí ná bá vé bivévé ya metúnŋa é byém bí sés tɔɔ kaa bidzo ósímánn éñí aa kaŋ ya byo Nzamá; ¹⁰amú e ne fáve bidzí, ya biñúúú, ya ásoy ya mendzímme mendzaŋ ya mendzaŋ; ngé ki ná, édí metsiŋŋ mé bot má mánan, éma mé ne ntélán akekwiñ é tám mam má ye tɔɔo nkomann.

¹¹Ve Kristo ñí a sian yaá ané ntébosú befára ye bembamba bé mam mé ntɔɔ mboann akála ñá etɔɔga dá eé daŋ fe ya ndén; éñí é ne kaa nkomann ya mó mé bot, dá yíli ná, se éñí ye mvelann ye é sí ñí; ¹²se ki ya mékií beyóm bíkélá, ngé ki éma bwann beyóm beñát, ve fáve ya mékií meñ émyen. Éde a ñíi yaá é Vóm wá daŋ ya Mfúfúp eyɔŋ déa akekwiñ kómm áse, néa éñe a ngá mana dzálá akoroga ye á mbéámbéa. ¹³Amú ná mékií beyóm bíkélá, ya éma beyóm beñát, ya ásuúp mwann ngéa ñát bá fwíi é bot bé kop yaá mvin, ngé byá tɔɔ eki á mfá etɔɔ mfúbánn ye ó ñúu, ¹⁴ntéññ avé mékií Kristo, ñí ya ákála Nsísim o ne mbéámbéa, a ngá vé émyen ané metúnŋa mé ne kaa ayeŋŋ, éñe aa ye fúbu ósímánn wenan ébe biwúwúa mǐboann á mfá ye ná míní kaŋ é Nzamá a ne ntétéa?

¹⁵Akála te édo, éñe a ne mvaŋ ye á mfefeñ elat; éde niané a ngá wú ákála ákoro bot ébe ntsamann metsiŋŋ ó ngá boban élat ósúa, á mfá ye ná ébá bé lwée yaá bé ñoŋ ngaá ye é tsígá e ne mbéámbéa. ¹⁶Amú ná é vóm tsígá e ne, dá yian ná é mot aa lík tsígá te á wú. ¹⁷Akála ná tsígá dá nzu bo ya eban fáve ya áwú, amú ná éyoŋ é mot aa vé tsígá a ngén ntétéa báa búan ya do. ¹⁸Édo ná, atwaa élat ósúa dá deé ndzí ki tára kaa mekií. ¹⁹Amú ná, niané Moisés a ngá mana táŋele ayɔŋ áse memvéná, amvála ané nkɔɔ métsiŋŋ wá lére, éde a ngá ñoŋ mekií beñát, ya éma beyóm bíkélá, fufúlu ya mendzímme, bivélé mívwaát mí ntómá ya memvwía mé isopo; éde a ngá myaman byo mǐtsili nkɔɔ metsiŋŋ ya áyoŋ áse, ²⁰eé dzó ná: “Mékií méye élat Nzamá a mánan yaá mína émo má.” ²¹Amvála te fe a ngá myaman etɔɔga mekií ya fe é byém bíse bá belan ya byo á mfá éséññ ye á nkaŋann. ²²Ya fe bebeñ ná dzóm ése dá tɔɔo mfúbánn ya mekií amvála ané nkɔɔ métsiŋŋ wá mánan. Éde ngé kaa nkúlánn mekií, ndzwiiann misémm wá ó sés ki.

Métúnŋa Kristo má vea nsémm

²³Ngúrá mfá, e ngá yian ná bifonann bí byém bíye á dzóp été bí tɔɔo mfúbánn amvála te. Ve mfá mbɔɔ, byém bíye á dzóp été bíbyen, byá byá yian ya metúnŋa má daŋ ya mvéañ álot éma méte. ²⁴Amú ná Kristo eé ndzí ñíi Mífúfúp mí Vóm, émi mí mbé nkomann ya mó mé bot, éma mé ne bifonann bíye ébí bí ne bebébélá, fáve ná á dzóp été ébyen, á mfá áke átébe ósú Nzamá éndagá ákála dea; ²⁵se ná aa vé émyen ané metúnŋa abwiññ biyoŋ, ámvála ntébosú befára aa ñíi é Vóm wá daŋ ya Mfúfúp kada mbú ya éyá mekií. ²⁶Da é tɔɔ ná, é ngá ye yian ná a yén midzuúk

abwiññ biyɔŋ atée ye é tám eniŋ é ngá tɔbɔ mvelann; ve áwola dí, métám méye á súgánn má, ñí a váma yaá eyɔŋ evɔ́ɔ akekwiñ mbéámbéá, ná aa tsam nsémm ébe mvéán émyen ané metúnŋa. ²⁷Éde ámvála dá é ntɔ́ɔ ntélán ná bot bá wú eyɔŋ evɔ́ɔ, véa, nkíkŋán misaŋ. ²⁸Ntéññ mbɔ́ɔ fe Kristo bé ngá vé ñí ané metúnŋa eyɔŋ evɔ́ɔ, ná aa vea mísémm abwiññ bot; ané aa ye váma éyɔŋ beañ, se ákála ávea nsémm, fáve á mfá ákoro é bot bá yana ñí bé tɔ́ɔ evévéñ.

10 ¹Amú ná, nkɔ́ɔ metsiŋŋ ó belé evagle ye bembamba bé mam mé nkún nzu, se mam méte mébyen; éde é bot bá kaŋ kada mbú bá vé metúnŋa mevɔ́ɔ ya mevɔ́ɔ, éma bá bé sés koan ya mo é ddam bébyen bá sɔŋ amvála enziŋ. ²Ngé éñe é bo néa, nde ngé mvéán metúnŋa wá kígi yaá? Dá é tɔ́ɔ ná bekaŋ Nzamá, niané bé tɔbɔ yaá mifúbánn eyɔŋ evɔ́ɔ, bá kaa ki fe ábera ábelé nsémm ósímánn. ³Fáve ná ébe metúnŋa méte, kada mbú má nzu ya mísémm ósímánn. ⁴Amú é sés boban ná, mékií beyóm beñát ya éma beyóm bikélá mé vea mísémm.

⁵Ya ddam te édo é tám aa nzu é sí ñí, aa dzó ná:

“We ndzí kómo metúnŋa ya bivévé,

ve ñúu édo ó koman yaá á mfá wɔm.” ⁶Bivévé bá dzígi ya metúnŋa ákála nsémm, weé ndzí byɔ yén mvéáñ.

⁷Véa éñe me ngá dzó ná: “Dágŋán

‘é ntɔ́ɔ ntsilann mítsili été á mfá wɔm ná’

Á Nzamá me sɔ yaá a mfá ádzálá nkómánn we.”

⁸Éde á tára yaá dzó ná: “Metúnŋa ya bivévé ya edí bá dzígi ákála nsémm, weé ndzí kómo, ngé ki áyén byɔ mvéáñ; ébí bíte ébyɔ bá vé ámvála nkɔ́ɔ métsiŋŋ wá mánan.” ⁹Véa éñe, aa dzó ná: “Dágŋán me sɔ yaá ná me dzálá nkómánn we.” Néa éñe aa vea edí ósúá, ná a téle edí beañ. ¹⁰Ya nkómánn te, édo bíá bí ntɔ́ɔ ntélán eki ébe metúnŋa méye é ñúu Yesukristo, eyɔŋ evɔ́ɔ akekwiñ mbéámbéá.

¹¹Éde ngúra mfá, fára áse a téle kada mos eé bo ásúk éséññ deñ, eé vé metúnŋa mevɔ́ɔ ya mevɔ́ɔ abwiññ biyɔŋ, éma má mé sés vea mísémm amvála enziŋ. ¹²Ve ébe ñí te, niané a ngá vé metúnŋa mevɔ́ɔ ákála mísémm eyɔŋ evɔ́ɔ akekwiñ mbéámbéá. Éde a ngá tɔbɔ ósɔ́ á mfá meyóm Nzamá, ¹³atéé ye ó véa, eé yana, akekwiñ ané mínzínzínŋ myeñ myá bo étéle mebo deñ. ¹⁴Amú ná ya metúnŋa mevɔ́ɔ a dzálá yaá edí bá sɔŋ akekwiñ mbéámbéá ébe ébá bé ne ntélán eki. ¹⁵Éde Mfúfúp Nsísim ñí aa vé fe bíá ngañiá; amú aa dzó ná:

¹⁶“Ntí á kɔ́bɔ yaá ná, élat ma ye bo bíabe bó éyɔŋ melú méte mé lot yaá édo dí:

Ma ye tɔɔ métsiŋŋ mam milém myeba été,

ma ye fe mo tsili á símánn deba été.

¹⁷Ma kaa ki fe ábera ábelé amvála enziŋ ósímánn mísémm myeba ya ntsamann metsiŋŋ weba.

¹⁸Ve é vóm bidzwiigá bí ne ébe é mam má, báá bera vé metúnja ákála nsémm.

Angəmm ya Nzamá

¹⁹Á bəbédzan, dá é tɔɔ ná bí ntɔɔ ya mebúnn á mfá áñfi é Vóm wá dan ya Mfufúp, amú mékií Yesus. ²⁰Ébe mfefeñ ya ntétéá nzenn a ngá túp bía, a tógán étóp áyát, dá yíli ná, ya é ñúu deñ. ²¹Éde bía bí belé é mora fára a ne ntébosú é ndá bot Nzamá, ²²bí yitgán bebeñ ya nlém mbɔɔ, ndzálánn ya mebúnn má sɔ ákála mbwínánn; bíi tɔɔ fe ya milém ntunán ébe mbéa ósímánn, é ñúu dea da nsopbánn ya mendzímme mé ne mfúbánn. ²³Bí biñgán oyan bía mem kaa áfógan. Amú ná éñfi a ngá kyaa a ne éñfi bá tɔɔ ya ñi mebúnn. ²⁴Éde bí tógán dága bevɔɔ ébe ébá bevɔɔ á mfá ávéánn nguu ébe edziñ, ya ébe bembamba mibɔann. ²⁵Kaa ádzɔɔ bíkóánn byea amvála ané bot benziñ bé mbelé dɔ fúlú, fáve ná bí lépgánán bevɔɔ ébe ébá bevɔɔ; ádañdan bí ntéa ná mos te ó ŋga yit yaá bebeñ.

²⁶Amú ngé bía tsini ya nkómánn ná bía bɔ nsémm éyɔñ bí ñɔñ yaá nyemann ye édí é ne bébélá, metúnja mé sés fe ákála mísémm, ²⁷fáve áyana mbéa ángónó nkíkgán misañ ya é ndúan ndén e nkún dzéa é bot bá sɔñ Nzamá. ²⁸É mot áse aa tsam nkɔɔ metsiñ Moisés aa wú kaa engóngɔɔ ákála bengañiá bé beañ ngé ki bé léa. ²⁹Nzá mora endáglé mína mína tém ná, aa yian ya dɔ, éñfi aa tsibi é Mwán Nzamá, aa ñɔñ fe ané mvin mékií méye élat mé ngá tɔɔ ñi ntélán eki, aa tea fe Nsísim ye á mvəmm? ³⁰Amú bía yem é mot a ngá kóɔ ná:

“Akunja é ne éedam,
ma ma ye dɔ búlu.”

Aa bera kóɔ ná:

“Ntí aa ye kík áyɔñ deñ misañ.”

³¹“Nzá ángónó dzam a ne ná o ku é mó é Nzamá a ne ntétéá!”

³²Ve símañán melú ó mvús, éma niané míní ngá ñɔñ eyéá, véa mínaá nzomo bora meyítán ya midzuúk; ³³akekwíñ ané míní tɔɔ ané ébá bá ñú meteá ya bindáglé éndendañ; ya fe ná míní nzu yaá sañan fufúlu mínabe ébá bá bé ngá belan ya bɔ ntéññ mbɔɔ néa. ³⁴Amú ná míní ngá yén mibok engóngɔɔ, mínaá yébe fe ya mesán ná bé dut mína é byém byenan; mína bébyen míní yem fe ná míní mbé míní belé é byém byá dan ya mvéañ, bíi lajan fe. ³⁵Ákála te édo míní táa ádzɔɔ mebúnn menan, éma mé ne ya mora obéá. ³⁶Amú ná mína yi edzíp, á mfá ye ná niané míní mana yaá bɔ nkómánn Nzamá, míní ñɔñ é ngaá bé kyaa yaá mína.

³⁷“Ákála ná nia avítsañ tám,
Éñfi aa nzu, aa ye sɔ kaa ki ábem.

³⁸Ve é nzósoó mot wəmm aa ye niñ ya mbwínánn;
ngé a búlán ó mvús,

nlém wɔm wá wǎá ye ní yén mvéáñ.”

³⁹Ve bía bí sés ébá bá búlán ó mvús ná bá dzán fáve ébá bé belé mbwínánn á mfá ábaale bínin byeba.

Mbwínánn

11 ¹Éde, mbwínánn ó ne átoɔ ya mebúnn ná édí bá yana é dzálában, bébélá ebánn ye édí báá bé yén. ²Amú ná ya éwɔ, éde mikúkúmá míye ókuá mí ngá ñɔɔ mbamba ngañiá. ³Akála mbwínánn, édo bía yem ya do ná eniɔ ngúra dá toɔ mvelann ya nkóɔ Nzamá; dá lére ná, édí dá yéne deé ndzí sɔ ébe é mam má yéne.

⁴Akála mbwínánn, édo Abel a ngá vé ya do Nzamá métúnɔa má dan ya mvéáñ álot éma Kaín; amú dzam te édo a ngá ñɔɔ ngañiá ná a mbé nzósoó mot, Nzamá eé vé ngañiá ébe bívévé byeñ. Akála éwɔ, afáɔɔ nwúán, a ngén aa kóɔ. ⁵Akála mbwínánn, édo bá ke ya do Enok á dzóp, éñe kaa áwú; bée ndzí ki koan ya ní, amú ná Nzamá aa ke ya ní; éde kaa ná bé vea ní, aa ñɔɔ ngañiá ná Nzamá a ngá yén ní mvéáñ. ⁶Ve, kaa mbwínánn bé sés vé Nzamá nlém mesán amvála enziɔ; amú dá yian ná é mot aa yit Nzamá bebeñ aa yian bwíni ná Nzamá éñe a ne, ya fe ná a ne Mvé meyaán ye ébá bá dzéɔ ní. ⁷Akála mbwínánn, niané Nzamá a ngá vé Noé mbámm ébe é mam mé mbé kaa ná mé yéne, éde ya mewók mé nkaɔann a ngá lóɔ Árka á mfá ákoro é ndá bot dzeñ; akála te édo a ngá vé ya do é sí ní meku; ané a ngá nzu ñɔɔ tsígá é nzósoó aa sɔ ákála mbwínánn.

⁸Akála mbwínánn, niané Nzamá a ngá lwée Abraam, éde a ngá ɔ mewók, eé kólo é vóm á mbé ná a nkún ñɔɔ ané tsígá, éde a ngá kólo kaa áyem é vóm aa ke. ⁹Akála mbwínánn, aa toɔ ané nnéɔ é sí Nzamá a ngá kyaa ní amvála ané éyá sí, eé ke aa toɔ bíbemm bá Isaak ya Jakob, beñɔɔ tsígá fufúlu béye ngaá fɔɔ ya fɔɔ; ¹⁰Amú ná a ngá yana kísoan, éñí e belé mbókga ó ne mbéámbéá, éñí Nzamá éñe a ne nkékéɔɔ ya nlóɔ kísoan. ¹¹Akála mbwínánn fe, Sara émyen ní a toɔ ekom, a ngá biñ nguú ye áñɔɔ abum, atwaa ákoan ná tám miningá é lot yaá ní; amú aa ñɔɔ ná éñí a ngá vé ní ngaá a ne éñí bá toɔ ya ní mebúnn. ¹²Ya dzam te fe, ébe mot mbɔɔ ákoan ní a ntɔɔ fe ané nwú, mvɔɔ bot e ngá féá amvála ané nɔmɔ atéteñ ye á dzóp, ya fe kaa tán amvála ané nséléga ó ne á nsá mán.

¹³Bésésé béte baá wú á mbwínánn, kaa ná bé ñɔɔ méngaá bé ngá kyaa ɔ; ve ákoan bé yén yaá mɔ oyaáp, bé ñɔɔ mɔ ya mesán; bée mem fe ná bé ne beyéɔ ya belot nzenn é sí ní. ¹⁴Amú ná ébá bá kóɔ amvála mam méte, bá lére éndendaɔ ná bá dzéɔ é sí deba bébyen. ¹⁵Éde ngé é ɔ ná bé ngá ɔ bée síman é sí bé ngá kólo, ngé bá belé fe tám ye ábúlán. ¹⁶Ve éndagá bé ngá dzéɔ é sí dá dan ya mvéáñ; éñí é ne éñí ye á dzóp. Ya dzam te édo Nzamá ní áá wók ki osoán ná bé lwée ní ná é Nzamá weba; ákála ná ní a koman yaá fe ɔ ngúra kísoan.

¹⁷Ákála mbwínánn, édo niané bé ngá kyak Abraam, ané a ngá vé Isaak ané metúnja, éde á nga vé metúnja é mwán mbóó ya mbóó weñ é ngá ñoñ mengaá; ¹⁸ébe mwán te éñe bá bé ngá kóbo ya ñí ná: “Ébe Isaak éñe bá ye lwée ná é mvoñ dzwe.” ¹⁹Ñí a ngá ñoñ ná Nzamá a ne téle mot atwaa béwú été; éde edí te fe, é tóó amvála ané efonann, ñí aá bera ñí ñoñ. ²⁰Ákála mbwínánn fe, édo Isaak a ngá bwárán ya do ya Jakob bá Esau, atwaa ébe mam mé mbé ná mé nkún nzu. ²¹Ákála mbwínánn, édo Jakob a tóó ná á nga wú yaá, a ngá vé kada mwán ye é bwán José abwará, éde a ngá kan Nzamá aa yágá á ntúmm weñ áyóp. ²²Ákála mbwínánn, édo José a tóó ná á nga wú yaá, a ngá kóbo á mfá nkólánn bwann bé Israel, a lík fe bó meyaán ébe bíveés byeñ.

²³Ákála mbwínánn, édo niané Moisés a ngá byála, beéséa baá swala ñí tán ngwan é léa; amú bá yén ná mwán te a mbé mbeñ, bá kaa ki áko átsiñj Kéza woñj. ²⁴Ákála mbwínánn, édo niané Moisés a ngá ku mot, aá tep ná bé lwée ñí ná é mwán Faraón ngwan deñ. ²⁵Ve aá tóó ná aa yén bindáglé fufúlu bábe áyoy Nzamá álot ná áyén é mvéañ da só ya nsémm ye é ne kaa átoó. ²⁶Éde aá ñoñ ná méteá Kristo émo mé ne ákúmm dá dan mitam míye Égipto; amú ná é mís meñ mé mbé mé bem óbéa. ²⁷Ákála mbwínánn, édo a ngá kólo ya do Égipto, éñe kaa áko méyéa Kéza woñj. Amú ná a mbé a yém ná sèñj amvála ané é mot a téa éñí a ne kaa áyéne. ²⁸Ákála mbwínánn, édo a ngá téle ya do Paskua ya ámyam mekií, á mfá ye ná éñí a ngá ywín mitóó mí bwán á nza nama éebéba.

²⁹Ákála mbwínánn, édo bé ngá kígán ya do Évéle Mánj été ané á nkót sí; éde niané Begipsio byá bí ngá vak do, ané bé ngá mana wú méndzímme été. ³⁰Ákála mbwínánn, édo mífim mékwá míye á Jerikó mí ngá ku ya do, niané bé ngá mana myo aboman tán melú zangbéa. ³¹Ákála mbwínánn, édo endendea miningá Raab é ngá bo kaa áwú ya do fufúlu bábe bebo meló; amú ná aá ñoñ ya mvwaá nsámá bot ó ngá ke fas sí asweññ.

³²Nzá dzam afé ma ye bera kóbo? Amú ná tám da ye ma dzéj á mfá ye ná me kanle edí Gedeón, ya Barák, ya Sansón, ya Jefe, ya David, ntéññ mbóó ané edí Samuel, ya fe edí bekúlu medzó; ³³ébá béte ákála mbwínánn, édo bé ngá wún ya do bidzwée bí ngómán bíye mésí, éde bé ngá bo edí é ne nzósoó, ané bé ngá ñoñ ndzálánn mengaá, éde bé ngá dzip bemgbemgbem menu; ³⁴ané bé ngá dzím nguu ndúán, éde bé ngá sáale nzep nzwaokenj, ané bé ngá veñan mingungúú áteák été, éde bé ngá veñan biywá bí bot á melúmán, ané bé ngá tsílán fe ya mísámá melúmán beyín. ³⁵Éde biningá bé ngá yén béwú beba béé wómo míwúán; ve éba bevóó bé ngá wú ákála eyíra, bá kaa ki áyébe akoroga, á mfá ye ná bé ñoñ áwómó dá dan ya mvéañ. ³⁶Ve éba bevóó bé ngá nú kpógo ya eyíra, akekwiñ nkáán ya bekalamekéná ya fe mibok. ³⁷Éba bevóó bá bé ngá lúm mekwá, ásik bó ya soó, ané bé ngá yén mebólé, éde bé ngá wú ya

nzwaoken, ané bé ngá wulu bé sɔ́ áká bé ne áká bé бага bikop mítómá ya bikop bikélá, bá kaa mam ó mó, awú ya midzuúk ya fe bindáglé. ³⁸Éniḡ dí dēé ngá yian ya amvála bot bété. Ébɔ́ béé wulu kaa áke simsim vóm, bíyáḡḡ été, mikoó été, mífuu mékwá ósí, ya míbíí míye á sí été.

³⁹Bésesé bété baá belé mbamba ngañiá ákála mbwínánn, ébɔ́ kaa áñḡḡ é ngaá bá kyaa bó; ⁴⁰amú ná Nzamá a koman yaá bía é dzóm dá danḡ ya mvéáñ, á mfá ye ná bá bé nza ke ñḡḡ édí bá sɔ́ḡ kaa bía.

Mélépgá Ntí

12 ¹Édo é ne ná, é tám bí mbelé ábímm mora nsámá bengañiá ó yala bía méféḡḡ wí, bí weagán ó fēñ é mvaba ése, ya nsémm wá mana bía ká. Bí máragán ya edzíp é nzenn dá swée bía ósú; ²mís má mé bem bía ébe Yesus, éñí a ngá tēñ ya á sɔ́ḡán mbwínánn wea; éñe a ne é mot a ngá nzomo osoán ye á krús, aa ñḡḡ dɔ́ ané avítsaḡ, ákála mėsán mé mbé ñí ósú, éde a ke yaá tɔ́bɔ́ ósí á mfá méyóm étɔ́ édzwée Nzamá.

³Túgán ádága é mot a ngá nzomo ébe émyen ámvála metea é ngá sɔ́ ñí ébe bebo misémm, á mfá ye ná míní nza teak, ngé ki ákílán á mílém myenan été; ⁴atwaa mélúmán míní belé ya nsémm, mínää bé mɔ́ ánzomo akekwiñ ané mína kúlu mekií. ⁵Éde míní vwían yaá mfoḡann mílém aa vé mína ané bwán ná:

“É Mwán wɔ́m, o taa ñḡḡ ané avítsaḡ áyágalé Ntí,
o taa ki ákílán ya ñí éyḡḡ aa bwaale wa;

⁶ákála ná Ntí aa yála ya melépgá é mot aa dziḡ,
aa vé fe akira éñí áse aa ñḡḡ amvála ané mwán.”

⁷Éde ébe melépgá mína nzomo, é ne ná, Nzamá ñí aa belan fe ya mína amvála ané bwán. Amú ná Mwán mbé a ne ná éséá áá vé ñí melépgá?

⁸Ve ngé mínää ñḡḡ melépgá, émá bwán bése bé ñḡḡ yaá, míní ntɔ́ éyá bwán, mína kaa fe bɔ́ é bwán beñ. ⁹Ya fe ná, bía bí mbé fe bí belé betará éniḡ dzi, béé vé bía melépgá ané beyágale bea, bía bí ngá vé fe bó ngaḡḡ. Ntéññ avé bía bía yian danḡ áku éséá ye á misísim ásí, éde véa bía ye niḡ?

¹⁰Amú ná ébɔ́, bé ngá vé bía melépgá ámvála bé ngá yén dɔ́ mvéáñ fáve ayomm melú; ve ñí aa bɔ́ dɔ́ akála é mvéáñ dea, ná bía bí ñḡḡ ngap fufúlu bíabe bó ébe eki deñ. ¹¹Ve melépgá menziḡ ye é tám ñí mé sés é dzam bá sán ya dɔ́, fáve ná mitéñ; véa dá wúm bibumá bíye á mvwaá ya éniḡ é ne tételé, ébe ébá bé mana yaá vébán ya dɔ́.

¹²Éde mína mitéteák mí mó, ya fe meboḡḡ mé teak yaá, ñḡḡḡán nguú; ¹³yɔ́ḡḡán ménzenn mé ne tételé á mfá mébo menan, ná éñí aa fígle a nza filan, fáve ná a let. ¹⁴Dzénḡḡán étɔ́ mvwaá ya bot bése, ya fe áɔ́bɔ́ eki, kaa édí te, mot enziḡ áá ye yén Ntí. ¹⁵Túgán dága ná mot enziḡ a nza súp é mvɔ́mm Nzamá; ndzi ye nlém eywiññ enziḡ wá ó nza féá ná ó nzu ya midzuúk, ó mana fe kop abwiññ bot. ¹⁶Mbó nsémm eveák enziḡ ñí a taa ki ábo, ngé ki éñí aa niḡ tugá amvála ané Esau, éñe a ngá kuan étɔ́ ntóó

deñ ya námm mbóó. ¹⁷Amú mína yem fe ná ósú véa, éyɔŋ a ngá kómo ñɔŋ tsígá abwará, éde bé ngá tep ñí, é mbé fe koan ya afóo ye édzoban, afáŋbo ná á ngá bíra dɔ ádzɛŋ ya míge.

¹⁸Akála ná míní ndzí yit bebeñ á nkoó, éwí bé ngá nama, ngé ki é ndúán e ngá yón, ngé ki ya nkút dzíbi, ngé ki edwá dzíbi, ngé ki okos, ¹⁹ngé ki elóŋŋ tɔŋ, ngé ki á nkóbo ó ngá sɔ, akekwiñ ná ébá bé ngá wók wó, bé nga dzaa engóngóó ná bé táa bera kóbo ya bó. ²⁰Amú ná bée mbé nzomo édí bé ngá mánan bó ná: “Atwaa é tsít ye áfan ése, ngé da nama nkoó te, da ye wú ya nlúmán mekwá.” ²¹Édí bé ngá yén é mbé ededea áŋgónó, ané Moisés ñí a ngá dzó ná: “Ma fógan beñeñeá akála wɔŋŋ.” ²²Ve mína, míní yit yaá á nkoó Sión bebeñ, é kísoan é Nzamá a ne ntétéá, é Yerusalen ye á dzóp, ékóánn binzuk bí baáŋgel, ²³ékóánn bebwíni mitóó mí bot, ébá bé ne ntsilann á dzóp été, ya é Nzamá a ne nkík misaŋ bot bése, ya mísísim benzósoó bé bot ébá bé mana yaá dzálá édí bá són, ²⁴ya Yesus, mvaŋ ye á mfefeñ elat, ya mékií mé myaman yaá, é má má kóbo mvéáñ álot é má Abel.

²⁵Dággán ná míní táa tep éñí aa kóbo ya mína. Amú ná ngé ébá béte beé ndzí sáale éyɔŋ bé ngá tep éñí a ngá lép bó é sí ñí, ntéññ avé bía, bía bíá ye ki sáale ngé bía lúm mvús éñí aa lép bía atée ye á dzóp. ²⁶É kíŋŋ deñ e ngá suk sí melú méte, ve a kyaa yaá éndagá eé dzó ná: “Ma ye bera suk, se fáve sí etámm, ve ná ya fe dzóp.” ²⁷Éde nkóbo wí ná: “Ma ye dɔ bera,” dá lére ná é byém byá sukban, é byém bí ne mvelann byá ye kólo; á mfá ye ná é byém bí ne kaa sukban ébyɔ bí tɔbo. ²⁸Ya dzam te édo, bía ñɔŋ ya dɔ édzwée ngómán é ne kaa sukban, bí biñŋán mvɔmm, éñí bía kaŋ ya dɔ Nzamá ya wɔŋŋ ye éki, ya fe ededea ngaŋŋ ámvála dá vé ñí nlém mesán. ²⁹Akála ná é Nzamá wea a ne é ndúán da dzéa ásesé.

É dzam dá vé Nzamá nlém mesán

13 ¹Edziŋŋ bobéñafwáa é tsíniŋé ósú. ²Míní táa vwíán áñɔŋ beyén, amú ná ya édo bot benziŋ kaa áyem, bé ngá ñɔŋ baáŋgel méndá. ³Míní síman mibok, ané ngé mína míní ne fe á mbok mínabe bó; ya fe ébá bá yén bindáglé, ámvála ané ngé a ne é ñúu dwe. ⁴Alúk é tɔbɔgé ya ngaŋŋ ébe mot áse; éñɔŋŋ ngéá bá nnóm dá é tɔbɔgé fe kaa mvin, akála ná bebo nsémm eveák bábe bebo medzián Nzamá aa ye bó kí kík misaŋ. ⁵É fúlú denan eé tɔbɔgé kaa edziŋŋ moann, tɔbɔgán mvwaá ya édí míní belé, amú émyen a dzó yaá ná:

“Mää ye wa lík tám enziŋ, mää ye ki wa lama ámvála enziŋ.”

⁶Dzam te édo bí ne dzó ya dɔ ya ededea mebúnn ná:

“Ntí éñe a ne éñí aa vwála ma;

mää ye ki kɔ wɔŋŋ. Mot aa ye ma bó dzé?”

⁷Ásímán bétébosú benan ébá bé ngá kat mína éfiá Nzamá, dággán ámvála bá wulu ya bíniŋ byeba, vúgán fe mbwínánn weba. ⁸Yesukristo

a ne ámvála déá oongogó, ya émuú, ya akekwiñ mbéámbéá. ⁹Kaa áyébán ná bíyá meýágalé mendzaŋ ya mendzaŋ bí ke ya mína; amú e ne mvéáñ ná nlém mot ó biñ nguu ébe é mvɔmm Nzamá, se ya bídzí bíye á nyébé bí ne kaa ávé abúánn ébe é bot bé ngá tsinibe été. ¹⁰Bía bí belé altar, édí ébá bá bɔ eséññ nkaŋann étɔbɔga bé sés filí ye ádzí été. ¹¹Akála ná bétsít ntébosú befára aa ke ya mekií meba é Vóm wá daŋ ya Mfúfúp amú misémm, bá dzigi bó á yát etɔbɔga átán. ¹²Dzam te édo Yesus, á mfá ye ná átéle ayɔŋ eki ya metúnŋa méye mékií meñ, édo aá yén ya do bindáglé á kísoan átán. ¹³Édo é ne ná, bí kwíñŋán á yát etɔbɔga átán, ná bía ke ébe éñe, bíí бага é kpógo weñ. ¹⁴Amú ná bíí belé é kísoan da laŋan á sí ó vá, fáve ná bía dzéŋ éñí eé ntɔɔ ná e nkún nzu. ¹⁵Ya édo bí váán ya do Nzamá tám áse metúnŋa mé olugú ébe éñe, dá yíli ná, ébumá ye ánu da mem éyola deñ. ¹⁶Ve, kaa ki ávwían añep, ya fe ávwálán bevɔɔ ya ébá bevɔɔ, amú ná amvála metúnŋa méte émo Nzamá aa yén mvéáñ.

¹⁷Tɔbɔgán ya mebúnn ya bétébosú; bɔgán fe bó mewók, amú ná bé tɔɔ evéveññ ákála bíniŋ byenan, amvála ané ébá bá ya ke ñɔŋ sitwá. Líkán bó ná bé bɔ do ya mesán, se ya mikéá, akála ná véa, dáá ye fe mína bɔ ya abúánn.

¹⁸Yaglánán akála dea, amú bí tɔɔ ya mebúnn ná bí belé mbamba osímánn, bíí kómo fe wulu ébe dzam áse tételé. ¹⁹Éde ma daŋ mína do ádzaa, á mfá ye ná bé dzíga ma búlu ébe mína.

Mébéránn má súdeŋ ya meýáán

²⁰Nzamá ye á mvwaá, éñí a ngá wómo Ntí wea Yesus á míwúán été, é mbaale mitómá nnén ébe mékií méye mbéámbéá elat, ²¹á komje mína ébe édí ése é ne mvéáñ, á mfá ye ná míní bɔ nkómánn weñ, eé bɔ ébe bía édí aa dziŋ ébe ásu deñ ákála Yesukristo. Éñe á tɔbɔgé ya dúmá atée ye mbéámbéá ye akekwiñ mbéámbéá. Amén.

Ádzip kálara

²²Á bɔbédzaŋ, ma dzaa mína ná míní nzomo nkɔbɔ melépgá; amú ná, me tsili yaá mína étun kálara dam dí. ²³Yemŋán ná mwadzaŋ Timoteo bé vé yaá ñí filí. Ngé a sɔ avóó, ma ye mína nzu áyén bía ñí. ²⁴Ábérán ya ma ya betébosú benan bése ya fe Bekristen bése. Ébá béye Italia bá bérán ya mína. ²⁵Mvɔmm eé tɔbɔgé ya mína bésesé. Amén.